

## TUTÚ DÍHNA NUU NĚ CADÚHA TÉ PÈLÚ

*Té Pèlú cádũha-dé tutú sá cúú-xí cuè ñáyiú sàndáá iní ñáhá xì Yá Ndiõxí*

<sup>1</sup> Yúhú té Pèlú ní tendaha ñàha Xítóhó Jesucristú xíca cùu-í càhá<sup>n</sup>-í tnúhu-gá, te cádúha-í tutú-a sá cúú-xí nchòhó ñáyiú xínchíté nuu ndècu distritú Pòntó, ndìhi distritú Gálaciá, ndìhi distritú Capadociá, ndìhi distritú Àsiá, ndìhi distritú Bìtiniá.

<sup>2</sup> Chi Dútú Ndiõxí ní cachí-gá sá cúú-ndó dèhe-gá ndéé cútnàhá vátá ngãva-gá ñuyíú, te Espiritú-gá ní quide-xi ndècu yiñuhu-ndo núú-gá vitna. Te ní cachí-gá sá cúú-ndó dèhe-gá cuèndá tni-ndo nchàa tnúhu càhá<sup>n</sup> Xítóhó Jesucristú, ndìhi cuèndá nduu ndoo nduu nine iní-ndó, chi ñiú cuèndá-á<sup>n</sup> ñí xíhí Xítóhó Jesucristú. Te xíca<sup>n</sup> táhù-í núú Yá Ndiõxí sá ïo na chìndee chitúu ñaha-gã xii-ndo cuèi vitna te cuèi núú cuàhá<sup>n</sup> núú vèxi, te ñiú-ni-gá ná cádá te ïo váha cuu iní-ndó cùndecu-ndo.

*Tnúhu ndee iní sá ndécú ndìhi ñáyiú sàndáá iní ñáhá xì Yá Ndiõxí*

<sup>3</sup> Te vitna chí ná càhí-ó sã ïo càhnu cuu Yá Ndiõxí Yaá cúú Tátá Xítóhó Jesucristú, chí ñiú-gá ïo ní cundàhú iní ñáhá-gã xii-o ñũu xíã<sup>n</sup> ní quide-gá sá nchóó ñí nduu-o dàtná ñ<sup>n</sup> ñáyiú saa vitna. Te duca<sup>n</sup> ñí quide ñaha-gã xii-o cuèndá sá Xítóhó Jesucristú ní xíhí-gá te ní ndoto-gá. Te cuèndá sá ñí nduu-o dàtná ñ<sup>n</sup> ñáyiú saa, xíã<sup>n</sup> ní ngúndecu ndìhi-o tnũhu ndee iní

<sup>4</sup> sá cùndècu ndihi-o-gá ni caa ni quíhí<sup>n</sup>, chi duca<sup>n</sup> nĩ cachí-gá cunduu. Te yàcá<sup>n</sup> vá quíní-gá-ó nì ì<sup>n</sup> sá cuèhé sá dúhá, te ío cudíí ìní-ó cùndecu-o ndihi-gá ni caa ni quíhí<sup>n</sup>.

<sup>5</sup> Te sá sàndáá iní-ó Yă Ndiöxí, núu xíá<sup>n</sup> coto ñaha-gă xii-o ndèé ná sàá nduu nàquehe<sup>n</sup> cuendá ñáhá-gă chi ío cãhnu cuu-gă.

<sup>6</sup> Te xíá<sup>n</sup> ío cùdíí ìní-ndó ndècu-ndo, te cuèi nándi ndòho-ndo ndecu-ndo dico sacú-ni nduu duca<sup>n</sup> ndòho-ndo.

<sup>7</sup> Te òré ná cádá cãhnu iní-ndó yăha-ndo nchàa sá ná càda ñaha ñáyiu xii-ndo, te duca<sup>n</sup> te cutnùní sàndáá ndisa iní-ndó Yă Ndiöxí, te sá dúcá<sup>n</sup> sàndáá iní-ndó Yă Ndiöxí ío-gá váha dàcúúxí dǐhú<sup>n</sup> cuàá<sup>n</sup> chi xíá<sup>n</sup> ñá túú cùdíí-xi. Te cuèi duca<sup>n</sup> dico xìto ndèé náhí-ní-güedě nũu ndisa cùu-xi díhú<sup>n</sup> cuàá<sup>n</sup>. Te duca<sup>n</sup> sãtnahá-xi cùu nchohó cuendá nchaa sá ndóhó-ndó, te na sàá nduu quixi tucu Xítóhó Jesu-crístú te cúñaha-gă xii-ndo: “Ío váha ní quide-ndo, te vitna ío cãhnu cuu-ndo, te tàú-ndó nùcùndecu váha-ndo”, duha cúñaha-gă xii-ndo.

<sup>8</sup> Te vitna ío cùu iní-ndó Xítóhó Jesu-crístú cuèi vátá quíní-gá-ndó-gă, te duca<sup>n</sup> ío sàndáá iní-ndó-gă, te ío cùdíí ìní-ndó te súúní nì ñá cùtnùní iní-ndó nãsa cunduu tnúhu cáhá<sup>n</sup>-ndó sã dúcá<sup>n</sup> ïo cùdíí ìní-ndó

<sup>9</sup> cuendá sá nĩ naníhí tàhú-ndó, chi ní sándáá iní-ndó-gă.

<sup>10</sup> Te cue téé ní xóo cáhá<sup>n</sup> tnúhu Yá Ndiöxí ndèé sanaha nĩ cachí-güedě nãcuáa cada-gá cundàhú iní ñáhá-gă xii-o vitna. Te cue téé-á<sup>n</sup> ïo váha ní dácuáhá-güedě nãcuáa cada Yá Ndiöxí dàcácu ni-hnu ñaha-gă xii-o vitna.

11 Te Espiritú Xítohó Jesucrìstú ní ngúndecu ndìhi cue téé-á<sup>n</sup> ñí xáha<sup>n</sup>-xi xii-güedé nàcuáa ndoho-gá, te ní xáha<sup>n</sup> tùcu-xi xii-güedé sá sàtá ná yáha ndoho-gá te ío cunuu-gã ndìhi Yá Ndiõxí. Te ío ní sani iní-güedé nũu ná nduu sãá duca<sup>n</sup> càda-xi, ndìhi nchaa nãndi-gá cúú sã cáda-xí.

12 Te Yá Ndiõxí ní xáha<sup>n</sup>-gã xii-güedé sá ncháá tnũhu váha càhá<sup>n</sup>-güedé vá cúú-xí cuendá méé-güedé, chi cuendá nchoo cuè ñáyi ndècu ñuyíú-a vitna cùu-xi. Te ñi-ni tnúhu-á<sup>n</sup> cúú tnũhu càhá<sup>n</sup> nchúhú cue téé càhá<sup>n</sup> tnúhu Yá Ndiõxí núú-ndó. Te Espiritú sá ñí taxi Yá Ndiõxí ndécú ndìhi-o chindee ñaha-xi xii-ndí càhá<sup>n</sup>-ndí tnúhu-gá. Te cue espíritú xínú cuèchi núú Yá Ndiõxí ío cuíní-xi quiní ndáá-xi nchaa nàcuáa cuáhá<sup>n</sup> tnúhu-á<sup>n</sup>.

### *Yá Ndiõxí càchí-gá sá cáda-ó mèe-ni sá vãha*

13 Te sá dúcá<sup>n</sup> ío váha ní guide ñaha Yá Ndiõxí xii-ndo xiã<sup>n</sup> xíní ñũhu-xi ío váha cuáha-ndo cuendá nàcuáa cundecu-ndo te vá cání iní-ndó càda-ndo ñí ñ<sup>n</sup> sá cuèhé sá dúhá, te ío quindáá iní-ndó sã Yá Ndiõxí cada váha ñaha-gã nduu na quixi tucu Xítohó Jesucrìstú.

14 Te ío tní-ndo nchàa tnúhu càhá<sup>n</sup> Yá Ndiõxí, te vá cúhú<sup>n</sup>-gã iní-ndó nãndi sá cuèhé sá dúhá sã ñí xúhu<sup>n</sup> iní-ndó cùtnàhá vátá cùndecu-gá-ndó ìchi-gá te ñí vã cáda-ndó.

15 Te cada-ndo mèe-ni sá vãha cundecu-ndo dàtná quidé mèe Yá Ndiõxí Yaá ní càhá<sup>n</sup> ñáhá xii-o cundecu-o ndìhi-gá.

16 Te càchí-gá núú tùtú-gá: “Cada-ndo mèe-ni sá vãha cundecu-ndo, chi duca<sup>n</sup> quíde yúhú”, duha càchí-gá núú tùtú-gá.

17 Te Yá Ndiöxí cada ndáá-gá cuéchi nchaa ñáyiú, te vá cádá cuèndá-gá cuèi náí ñáyiú cùú-yu, te nchòhó càchí-ndó sǎ díú Tǎtá-ndó cùu-gá te ndáá, núu xǎ<sup>n</sup> xíní ñùhu-xi canehe-ndo sá yíñùhu núú-gǎ ndí nchàa nduu cundecu-ndo ñuyíú-a.

18 Te ñu-gá ní dácǎcu nihnu ñaha-gǎ xii-ndo ñ<sup>n</sup> ichi sá ñà túú nàndíhi ní sanu ichi ñaha cuè ñaní tnáhá-ndó ñí xíndecu ndéé sanaha ní cùu, te nchòhó sa nàha-ndo sá sǎ dúcá<sup>n</sup> ñí quide ñaha Yá Ndiöxí ní dácǎcu nihnu ñaha-gǎ xii-ndo ìchi-á<sup>n</sup> ñà túú ní chǎhu-gá ní ñ<sup>n</sup> díhú<sup>n</sup> cuàá<sup>n</sup>, te ní ñ<sup>n</sup> díhú<sup>n</sup> cuixí<sup>n</sup> sá ndíhí nihnu ñuyíú-a cuèndá-ndó.

19 Chi Xítóhó Jesucrístú ní quixi-gá ní sati níñí-gǎ, te ní xíhí-gá núú cùrúxí cuèndá sá nchóó nàníhí tǎhú-ó, te cùu-gá dàtná ñ<sup>n</sup> mbéé quiti ío váha iní-xi, quiti càndoo canine.

20 Te duca<sup>n</sup> ñí ndoho Xítóhó Jesucrístú, chi duca<sup>n</sup> tnáhí ndéè tnuní ndoho-gá ndéé cútnáhá vátá ngǎva-gá ñuyíú. Te duca<sup>n</sup> ñí yáha-gá cútnáhá ní quixi-gá òré vitna cùmání sǎá nduu nàa ñuyíú-a cuèndá nchoo cùu-xi sá vǎha xii-o vitna.

21 Te nchòhó sa nihí-ndó tnùhu nàcuáa ní yáha Xítóhó Jesucrístú cútnáhá ní quixi-gá ñuyíú-a, núu xǎ<sup>n</sup> sàndáá iní-ndó Yǎ Ndiöxí. Te Yá Ndiöxí ní dándótó-gǎ Xítóhó Jesucrístú, te sátá ñí dándótó ñaha-gá te ní cachí-gá sá ïo càhnu cuu Xítóhó Jesucrístú. Te sá dúcá<sup>n</sup> ñí cuu, xǎ<sup>n</sup> ío sàndáá iní-ndó Yǎ Ndiöxí, te ní taxi-gá tnùhu ndee ìní ndécú ndíhi-ndo sá sǎá nduu cundecu-ndo ndíhi-gá ní caa ní quíhí<sup>n</sup>.

22 Te Espíritú Yǎ Ndiöxí ní quide-xi te ní sàndáá iní-ndó tnùhu-gá, te xǎ<sup>n</sup> ní nduu ndoo ní nduu

nine iní-ndó, te cùu iní tnáhá ndìsa-ndo nacuaá ndècu-ndo ichi Yá Ndiöxí, te xìni ñuhu ndisa-xi sá ïo ni yùhu ni iní-ndó cùu iní tnáhá-ndó ì<sup>n</sup> ì<sup>n</sup>-ndo.

23 Te nchòhó ní nduu-ndo dàtná ì<sup>n</sup> ñáyiú saa sá cuendá tnúhu Yá Ndiöxí, te tnúhu-á<sup>n</sup> candeca-xi iní-ndó nì caa ni quíhí<sup>n</sup>, te vá í<sup>n</sup> ndùu ndìhi ni-hnu-xi, te ñá díú cuendá ñáyiú ñuyíú-a ni ndùu-ndo ì<sup>n</sup> ñáyiú saa chi cuendá tnúhu-gá.

24 Chi núú tùtú Yá Ndiöxí càchí-xi:

Nchaa ñáyiú ndècu ñuyíú-a cùú-yu dàtná cùhú, chi cùhú-á<sup>n</sup> tnaa-ni cùdí-xi te xìhí-xi, duca<sup>n</sup> sãtnahá-xi cùú-yu.

Te nchaa sá ndécú ndìhí-yu cùu-xi datná ì<sup>n</sup> itá cùhú-á<sup>n</sup>, chi itá-á<sup>n</sup> tnaa-ni tucu cùdí-xi te ndàhvá-xi, duca<sup>n</sup> sãtnahá-xi cùu nchaa sá ndécú ndìhí-yu.

25 Dico tnúhu Yá Ndiöxí chi vá náá tnàhí-xi, chi duha-ni ndècu-xi, te ñiú-ni duha cundecu-xi ni caa ni quíhí<sup>n</sup>.

Duha càchí-xi núú tùtú-gá. Te ñiú tnúhu-á<sup>n</sup> ñí dánèhé ñáhá nchùhú cue téé càhá<sup>n</sup> tnúhu Yá Ndiöxí xii-ndo.

## 2

1 Te xíá<sup>n</sup> xíní ñuhu-xi dañá-ndo nchaa núú sã cuèhé sá dúhá, te dañá-ndo ichi tnúhu ndehnde, te dañá-ndo vã dándáhú-gá-ndó mèe-ndo sá quidé vãha-ndo, te dañá-ndo ichi cuedú íní, te dañá-ndo nchaa tnúhu yiti.

2 Te çada-ndo cuendá sá cúú-ndó dàtná cue landú yíqui<sup>n</sup> vitna sadi camá, chi landú-á<sup>n</sup> mee-ni sadi-güexi te sàhnu-güexi. Te cada iní-ndó sã dúcá<sup>n</sup> càda-ndo chi xìni ñuhu-xi sá ïo cuhu<sup>n</sup> iní-ndó dàcuaha-ndo tnúhu Yá Ndiöxí, chi xíá<sup>n</sup> cúú-xí

mè-ni tnúhu váha, te duca<sup>n</sup> te cuita cuehnu nihnu-ndo ìchi-gá quíhí<sup>n</sup> ndéé ná sàá nduu cùndecu-ndo núú ndécú-gă.

<sup>3</sup> Te duca<sup>n</sup> xìni ñuhu-xi cada-ndo, chi nchòhó sa ní cutnùní ndisa iní-ndó sǎ Yǎ Ndiǒxí ío váha iní-gá.

*Xítóhó Jesucrìstú cúú-gă dàtná ì<sup>n</sup> yúú*

<sup>4</sup> Te ío nanducu nihnu-ni-ndo Xítóhó Jesucrìstú Yaá quidé nàcuáa naníhí tàhú-ó. Te diu-gá ní cuu-gá dàtná ì<sup>n</sup> yúú sǎ ñà túú nàndihì sá cúú-xí ñǎyiu ñuyíú-a, chi ní dáquée tíhú ñáhǎ-yu xii-gá. Dico Yá Ndiǒxí ní cachí-gá sá Xítóhó Jesucrìstú cúú-gă dàtná ì<sup>n</sup> yúú sǎ ìo-gá váha, chi ío cùnuu-gá.

<sup>5</sup> Te nchòhó sa ní naníhí tàhú-ndó, te ío-gá chí nándùcu nihnu Yá Ndiǒxí cuèndá cuu ì<sup>n</sup>nuu-ndo cùndecu-ndo ndihì Espíritú-gá. Te núu duca<sup>n</sup> na càda-ndo te cuu-ndo dàtná yúú vǎha dàcaa-güedé dava vehe, te cuu tucu-ndo dàtná cue dútú ñǎ xinu cuechi núú Yǎ Ndiǒxí ndéé sanaha, nàcuáa ñǎ túú ñǎ cumání-ndó núú-gă, chi nchaa cue téé-á<sup>n</sup> ñǎ xóo cuáha ñaha-güedě sá ñǎ xóo nduu tàhú-gă. Te nchòhó vitna tàú-ndó càda-ndo nchaa nacuáa càhá<sup>n</sup>-gá, te nduu vétú iní-gá. Te duca<sup>n</sup> càda-ndo chi ndècu-ndo ndihì Xítóhó Jesucrìstú.

<sup>6</sup> Te Yá Ndiǒxí càchí-gá núú tùtú-gá:  
Yúhú taxi ndecu-í ì<sup>n</sup> Yaá ñuu Sión,  
te cuu-gá dàtná ì<sup>n</sup> yúú vǎha sá sánútnǎ-güedé xíquí  
cimièntú ì<sup>n</sup> vehe, chi yúhú ní cachí-í sá  
Yàá-á<sup>n</sup> ìo cunuu-gă.

Te nchaa ñáyiu quìndáá iní ñáhá xii-gá vá ì<sup>n</sup>  
ndùu ndixi cuéchi iní-yu sá dúcá<sup>n</sup> sàndáá iní  
ñáhǎ-yu xii-gá.

Duha càchí-gá núú tùtú-gá.

<sup>7</sup> Te nchòhó ñáyiú sàndáá iní ñáhá xii Xítóhó Jesucristú ío cùu iní-ndó-gă, te nchaa ñáyiú ñá túú sàndáá iní ñáhá xii-gá quidě-yu dàtná càhá<sup>n</sup>-xi núú tütú Yá Ndiöxí núú càchí-xi:

Yúú sã ní dáquéé tǐhú cue téé dàcaa vehe, xiã<sup>n</sup>  
cúú-xí yúú sã ïo-gá nándǐhi vitna.

Duha càchí-xi núú tütú-gá. Te yúú-ã<sup>n</sup> cada iní-ó sã cúú-xí Xítóhó Jesucristú, chi ní dáquéé tǐhú ñáhá-güedě xii-gá.

<sup>8</sup> Te càchí tucu-xi ìngá xichi núú tütú Yá Ndiöxí:

Yúú-ã<sup>n</sup> nguñenu ñáyiú te ndùá-yu.

Duha càchí-xi núú tütú-gá. Te tnúhu-á<sup>n</sup> quéé-xí sã ïo quide sáá iní ñáyiú núú-gă, chi ñá túú cuení-yu tñi-yu tnúhu càhá<sup>n</sup>-gá, te duca<sup>n</sup> tnàhí ndèé tnuní sá ncháá ñáyiú ñá túú cuení tñi tnúhu càhá<sup>n</sup>-gá, te ío cùu sáá iní-yu núú-gă.

### *Ñáyiú ndècu ndihi Yá Ndiöxí*

<sup>9</sup> Te nchoo cùu-o ñáyiú sa ní dáquéé dǐ<sup>n</sup> ñaha Yá Ndiöxí xii-o cuendá cundecu-o ndihi-gá, te cùu-o dútú xínú cuèchi-o núú-gă, te mee-gă cúú-gă Yaá ío cùnuu, te cùu-o ñáyiú quide ndáá xĩndecu ichi-gá te cùu tucu-o ñáyiú yĩndaha-gá. Te duca<sup>n</sup> ní quide ñaha-gă xii-o cuendá sá cǔñaha-o xii nchaa ñáyiú sá ïo càhnu cuu-gá, te ío vài núú sã vãha quide-gá, te ðiu-gá ní quide ní dáñá-ó nchàa ichi cuehé ichi duha ndècu-o ní cuu, te ní sanu ichi ñaha-gă xii-o ñ<sup>n</sup> ichi váha, te vitna cùtnuní iní-ó sã ïo càhnu cuu-gá.

<sup>10</sup> Te nchoo cùu-o ñáyiú ñá túú ndècu ndihi Yá Ndiöxí ní cùu, dico vitna ní ngúndecu ndihi-o-gă, te dàvá-á<sup>n</sup> vǎtá sàá-gá nduu càda váha ñaha-gă xii-o,

dico vitna sa ní sáá nduu quide váha ñaha-gă xii-o, chi ío cùndahú iní ñáhá-gă.

*Cada váha-o cùndecu-o cunu cuechi-o núú Yă Ndiõxí*

<sup>11</sup> Te nchòhó ío cùu iní ñáhà-í xii-ndo, te càchí tnúhu-í xii-ndo sã nchóó cùu-o datná cue ñáyiu ndècu tnaduha ì<sup>n</sup> ñuú, te duca<sup>n</sup> sãtnahá-xi cùu-o chi tnaa-ni ndècu-o ñuyíú-a, te sáá nduu ndùu táhú-ó cùndecu-o núú ndécú Yă Ndiõxí táxí tnùnì-gá, te xíã<sup>n</sup> càhá<sup>n</sup> ndàhú-í núú-ndó sã vã cádá-ndó ñi ì<sup>n</sup> sá cuèhé sá dúhá sàni iní-ndó, chi nchaa xíã<sup>n</sup> ñá túú cùu-xi sá vãha sá cúú-xí-ndó.

<sup>12</sup> Te cada váha-ndo cùndecu-ndo núú nchàa ñáyiu ñá túú ndècu ichi Yá Ndiõxí, te cuèi na càhá<sup>n</sup> ñáyiu sá nchòhó nchìcú<sup>n</sup> nihnu-ndo ìchi cuehé ichi duha, dico quini-yu nchaa sá vãha quide-ndo, dico na sáá nduu dândixi túu Yá Ndiõxí iní-yu sá ñà túú quide váha-yu ndécú-yu, te dàvá-á<sup>n</sup> cachí-yu sá quidé vãha-ndo ndècu-ndo, te cada càhnú-yu Yá Ndiõxí.

<sup>13</sup> Te Xítóhó Jesucristú cuinì-gá sá nchòhó ío quindáá iní-ndó nchàa cue tée cùchiu<sup>n</sup> taxi tnunì ñáhá xii-ndo, te duca<sup>n</sup>-ni quindáá iní-ndó cuèi mee tẽ cùnuu vihi-gá yíndàha ñaha xii ñáyiu.

<sup>14</sup> Te duca<sup>n</sup>-ni quindáá iní-ndó nchàa dava-gá cue tée cùnuu, chi Yá Ndiõxí duca<sup>n</sup> ñi cachí-gá cundu sá cuè tée-á<sup>n</sup> cada ndáá-güedé nchaa cuèchi ñáyiu quide cuehé quidé dùha ndecu, te càhá<sup>n</sup> váha-güedé cuendá nchaa ñáyiu xíquide váha ndècu.

<sup>15</sup> Te Yá Ndiõxí cuinì-gá sá cádá vãha-ndo cùndecu-ndo cuendá nchaa ñáyiu ío ñi ñi dǐquí-xi càhá<sup>n</sup> cuèhé cuendá-ndó sã ndécú-ndó ìchi Yá Ndiõxí vá ñihí-gá-yu tnúhu càhá<sup>n</sup>-yu.



16 Te nchòhó, Yá Ndiöxí ní quide-gá sá cúú-ndó ñáyiú cuu cada nàcuáa véxi iní mée-xí, dico ñá díú sá dúcá<sup>n</sup> ñí quide ñaha-gă xii-ndo, te ngóo-ndo càni iní-ndó càda-ndo nándi sá cuèhé sá dúhá, chi cada-ndo sá cúú-ndó ñáyiú xìnu cuechi núú Yă Ndiöxí.

17 Te canehe-ndo sá yíñùhu núú nchàa ñáyiú, ndihí núú tée cùnū vihi yindaha ñaha xií-yu, te cuu iní tnáhá ndì mee-ndo nacuáa ndècu-ndo ichi Yá Ndiöxí, te ío canehe-ndo sá yíñùhu núú-gă.

*Nchaa nàcuáa ndoho-o cùndecu-o ichi Xítóhó Jesu-crístú*

18 Te nchaa nchòhó ñáyiú xìnu cuechi canehe-ndo sá yíñùhu núú cuè patrón-ndó, te quíndáá iní-ndó càda-ndo nchaa chiu<sup>n</sup> tahu-güedé. Te ñí<sup>n</sup>-ni càda-ndo núú cuè tée vâha iní-xi, ndihí núú cuè tée ío cuihna ñí-xi.

19 Te núú nchòhó ná càda ndee iní-ndó ndòho-ndo nchaa sá ñà túú tàú-ndó ndòho-ndo cuendá sá cuíni-ndó cùndáá-ndó núú Yă Ndiöxí ñá, te ío nduu vétú iní-gá.

20 Te núú nchòhó ní quide-ndo ñí<sup>n</sup> cuéchi, te sàhni iní-ndó dândoho ñaha ñáyiú xii-ndo, ¿te ná sá vâha cùu xí<sup>n</sup>-i? Dico núú nchòhó ná cádá ndèe iní-ndó ndòho-ndo nchaa sá cádá ñaha ñáyiú xii-ndo sá cuendá sá quidé-ndó sá vâha ña, te núú duca<sup>n</sup> na càda-ndo te cùu-xi ñí<sup>n</sup> sá vâha núú Yă Ndiöxí.

21 Te Yá Ndiöxí ní cachí-gá sá cádá ndèe iní-ó ndòho-o nándi ndoho-o sá cuendá sá quidé-ó sá vâha, chi ío ní ndoho Xítóhó Jesu-crístú cuendá-ó, te duca<sup>n</sup> tàú-ó cànchicú<sup>n</sup> nihnu-o càda ndee iní-ó ndòho-o nándi ndoho-o, chi duca<sup>n</sup> ñí quide-gá.

22 Te mee-gã ñá túú quide-gá ni ì<sup>n</sup> sá cuèhé sá dúhá, te ni ì<sup>n</sup> tnúhu ndehnde ñà túú càhá<sup>n</sup>-gá.

23 Te òré ní xóo cúcuèhé ñáhá-güedě xii-gá, te ñá túú ní xóo danchòcáva-gá tnúhu cuèhé, te òré ní xóo dandòho ñaha-güedé xii-gá, te ñá túú ní xáha<sup>n</sup>-gã xii-güedé sá íó ná cada ñaha-gã, chi núú ndáhá Yá Ndiõxí ní xóo nachihi-gá méé-gã, ndihi nchaa sá sání ìní-güedé cada ñaha-güedě xii-gá. Te Yá Ndiõxí cúú-gã Yaá ío váha cada ndáá cuéchi nchaa ñáyiú na sàá nduu.

24 Te Xítóhó Jesucrìstú cúú-gã Yaá ní xíhí núú cùrúxí cuendá nchaa cuéchi nchoo ñáyiú ndècu ñuyíú-a. Te duca<sup>n</sup> ñí xíhí-gá cuendá nchoo dùu<sup>n</sup> duu<sup>n</sup> dañá-o nchaa ichi cuehé ichi duha, te cada ndáá-ó cùndecu-o ichi-gá. Te ní dánícuèhé ñáhá-güedě xii-gá, te sá dúcá<sup>n</sup> ñí ndoho-gá xíã<sup>n</sup> ní ngúndecu váha nchoo vìtna.

25 Te nchoo cùu-o datná cue mběé cue quití ní xíta ni cùu, dico vìtna ní tuha-o Xítóhó Jesucrìstú, te Yaá-á<sup>n</sup> cúú-gã dàtná ì<sup>n</sup> toli xìto ñaha-gá xii-o vìtna cuendá sá vã cuíta nihnu-o.

### 3

#### *Nàcuáa tàú ñáyiú tnãndaha cadá-yu cundecú-yu*

1 Te nchaa nchòhó ñáyiú dèhí ní tnandaha ío quindáá ìní-ndó yì-ndo cuendá sá nùu ñá túú sàndáá ìní-güedé tnúhu Yá Ndiõxí te quindáá ìní-güedé cuendá sá ndéhé-güedě quídé ndáá-ndó ndècu-ndo, te ni ñà túú xini ñuhu-xi cáhá<sup>n</sup>-ndó tnúhu-gá núú-güedě.

2 Chi ndèhe mee-güedé sá nchòhó quidé ndää-ndó ndècu-ndo, te nèhe-ndo sá yĩñuhu núú Yă Ndiõxí.

3 Te vá cání iní-ndó mée-ni cunduu vii-ndo, te ndada-ndo dĩquí-ndó nàcuáa tàú-xi cunduu, te vá cání iní-ndó nãndi canehe-ndo, te ni vã cání iní-ndó cuĩhnu-ndo mee-ni dóó vãha sá ïo vii ndáa.

4 Chi iní-ndó xìni ñuhu-xi cunduu vii cunduu váha-xi núú Yă Ndiõxí cuěi vitna te cuěi núú cuáhá<sup>n</sup> núú vëxi, te cuu-ndo ñăyiu ío càhnu iní-xi, te núú duca<sup>n</sup> na càda-ndo te ío cuu váha iní Yă Ndiõxí.

5 Te duca<sup>n</sup> ío vii ío váha ní xĩnduu iní nchaa ñăyiu dĩhí ní xĩndecu ndéé sanaha, te ñăyiu-á<sup>n</sup> ïo ní sándáa iní-yu Yá Ndiõxí te ní cudĩú-yu núú-gă, te ní tnĩ-yu nchaa tnúhu ní cáhá<sup>n</sup> yĩ-yu.

6 Te duca<sup>n</sup> ñĩ xóo cada ndíi Sără ní xóo quindáa iní ndíi yĩ ndíi, ndíi Àbrahám, te ní cánehe ndíi dĩhí-á<sup>n</sup> sã yĩñuhu núú yĩ ndíi. Te núú nchòhó quidé vãha-ndo ndècu-ndo te ñá túú yùhú-ndó nã cada ñaha tnàha ñăyiu-ndo xì-ndo, te núú duca<sup>n</sup> quide váha-ndo ndècu-ndo te quide-ndo datná ní quide ndíi Sără.

7 Te nchòhó cue téé ndècu ñadihí-xi ío váha cuáha-ndo cuendá nàcuáa cundecu váha-ndo ndĩhí-yu, te ío vii cáhá<sup>n</sup> ndihí-ndõ-yu, chi ñăyiu-á<sup>n</sup> ïĩ-gă-yu dàcúxí nchòo cue téé, te duca<sup>n</sup> càda-ndo chi ndí ndũú-ndó ndũu táhú-ndó cundecu-ndo ndihí Yă Ndiõxí, te núú duca<sup>n</sup> na càda-ndo te òré cáhá<sup>n</sup> ndihí-ndo Yă Ndiõxí te tedóho ñaha-gă xii-ndo.

### *Ñăyiu quide sá vãha ndòhó-yu*

8 Te cáhí tnúhu tucu-í xii-ndo sã ïo cuu ñ<sup>n</sup>nuu-ndo cundecu-ndo, te cundàhú iní tnáhá-ndó

ñ<sup>n</sup> ñ<sup>n</sup>-ndo, te cuu iní tnáhá tùcu-ndo nacuáa ndècu-ndo ichi Yá Ndiöxí, te cuu-ndo ñáyiú ndàhú iní-xi.

<sup>9</sup> Te núu ñ<sup>n</sup> sá ñà túú vǎha quide ñaha ñáyiú xii-ndo, te ñá díú-ní dùca<sup>n</sup> nanchocáva-ndo càda-ndó-yu, àdi xícuèhé ñáhǎ-yu xii-ndo, te vǎ ná dǎnchocáva-ndo diú-ni tnúhu cuèhé, chi cáca<sup>n</sup> táhú-ndó núú Yǎ Ndiöxí cuendá sá ná cáda vǎha ñaha-gǎ xii-yu, te duca<sup>n</sup> càda-ndo chi Yá Ndiöxí ní cáhá<sup>n</sup> ñáhǎ-gǎ xii-ndo cuendá sá cáda vǎha ñaha-gǎ xii-ndo tnáhǎ-ndó.

<sup>10</sup> Te núú tùtú Yǎ Ndiöxí càchí-xi:  
Nchaa ñáyiú cuìní cundecu váha ndi nchàa nduu  
nini cundecú-yu ñuyíú-a,  
xìni ñuhu-xi sá vǎ càhá<sup>n</sup>-yu tnúhu cùtexínu, te ni vǎ  
dácuàndehndé-yu.

<sup>11</sup> Te xìni ñuhu-xi duu<sup>n</sup> duu<sup>n</sup> dañá-yu nchaa ichi  
cuèhé ichi duha, te cadá-yu mee-ni sǎ vǎha,  
te ío ndùcú-yu nàcuáa cadá-yu cundecu váha-yu  
ndihì tnàha ñáyiú-yu te diú-ni duca<sup>n</sup>  
cànchicú<sup>n</sup> nihnú-yu cadá-yu.

<sup>12</sup> Te Yá Ndiöxí xító-gǎ nchaa ñáyiú quide ndáá  
núú-gǎ  
te tedóho-gǎ nchaa tnúhu càhá<sup>n</sup>-yu,  
dico nchaa ñáyiú ñá túú cuìní cada ndáá, ñáyiú-án  
ñà túú cùu váha iní-gǎ núú-yu.  
Duha càchí-xi núú tùtú-gǎ.

<sup>13</sup> Te vǎ yǒo níhí ndéé càda ñaha xii-o ñ<sup>n</sup> sá ñà túú  
vǎha te núu mee-ni sǎ vǎha na càda-o cundecu-o.

<sup>14</sup> Àdi núu ná cúú sǎ ná cáda ñàha ñáyiú xii-o sǎ  
cuendá sá quidé vǎha-o ndècu-o ña, te sá dúca<sup>n</sup> ná  
cáda ñáhǎ-yu xii-o cùu-xi ñ<sup>n</sup> sá vǎha sá cúú-xí-ó  
núú Yǎ Ndiöxí. Te na càchí tnúhu-í xii-ndo sǎ vǎ

yùhú-ndõ-yu, te ni vǎ cùndìyí-ndó cuèndá nchaa sá ná càda ñahá-yu xii-ndo.

<sup>15</sup> Te nèhe-ndo sá yíñùhu núú Xítóhó Jesucrìstú. Te ío cundecu túha-ndo dànehé-ndó ñǎyiu véxi ndùcu tnúhu núú-ndó nàcuáa ndùu tnúhu ndee ínì ní taxi Xítóhó Jesucrìstú ndécú ndìhi-ndo, te cuu vii cuu váha ínì-ndó cǎhá<sup>n</sup> ndìhi-ndõ-yu, te cǎhá<sup>n</sup>-ndó nǔũ-yu mee-ni tnũhu yíñùhu nacuáa cùu váha ínì Yǎ Ndiõxí.

<sup>16</sup> Te ío çada váha-ndo cùndecu-ndo cuendá sá vǎ cùndìyí-ndó, te núu duca<sup>n</sup> na càda-ndo, te nchaa ñǎyiu xǐcuèhé ñahá xii-ndo cuendá sá quidé vǎha-ndo ndècu-ndo ichi Xítóhó Jesucrìstú quendóo canúũ-yu ndìhi nchaa tnúhu cǎhá<sup>n</sup>-yu, chi nchòhó quidé vǎha-ndo ndècu-ndo.

<sup>17</sup> Te váha-gá sá ndóhó-ó cuèndá sá quidé-ó sǎ vǎha te núu mee Yǎ Ndiõxí duca<sup>n</sup> cuínì-gá cunduu, te ñá díú sǎ ndóhó-ó cuèndá sá ñà túú quide-o sá vǎha.

<sup>18</sup> Te Xítóhó Jesucrìstú ní xíhì-gá sá cuèndá nchaa cuéchi nchaa nchoo ñǎyiu ndècu ñuyíú-a, te ì<sup>n</sup> xito-ni duca<sup>n</sup> ñǎ xíhì-gá te duca<sup>n</sup> te vá cùú tnàhì-gá, te mee-gǎ cúú-gǎ Yaá ñá túú tnàhì cuéchi-xi, te duca<sup>n</sup> ñǎ ndoho-gá cuèndá nchaa cuéchi ñǎyiu ndècu ñuyíú-a ñǎyiu ñá túú cuínì cada ndáá núú Yǎ Ndiõxí, te duca<sup>n</sup> ñǎ cuu cuèndá sá núcùndecu váha-yu núú Yǎ Ndiõxí te núu na quíndáá ínì ñáhǎ-yu xii-gá. Te mee-gǎ ní xíhì-gá ñico Espíritú-gá chi ní xíndecu-ni-xi,

<sup>19</sup> te Espíritú-gá ní sáhá<sup>n</sup>-xi ní cǎhá<sup>n</sup>-xi tnúhu Yá Ndiõxí núú nchaa espíritú ñǎyiu ndècu núú ùhú núú ndàhú.

<sup>20</sup> Te ñǎyiu-á<sup>n</sup> cúú ñǎyiu ní xíndecu ndéé sanaha

cůtnàhá ní xíndecu ndíi Nöé, chi ñáyiu-á<sup>n</sup> ïo ní quide sàá iní-yu núú Yă Ndiöxí. Te Yă Ndiöxí ío váha iní-gá, chi ní dácácá-gă nduu ñi xíndecuu ndíi Nöé ní cadúha ndíi bàrcú cuèndá ndétú-gă ndixi cuèchi iní-yu sá ñà túú quide váha-yu ndècú-yu ni cùu. Te dàvá-á<sup>n</sup> ñi ndaa ndute ñuyíú te ní cácu úná duha ná tnàhá ñáyiu, chi ní quée-yu xití bàrcú-á<sup>n</sup>, te ñà túú ní cǎhá-yu.

<sup>21</sup> Te sá dúcá<sup>n</sup> ñi cácu ñáyiu úná-á<sup>n</sup> ñà túú ní cǎhá-yu ndute ní ndaa ñuyíú dàvá-á<sup>n</sup>. Te xǎ<sup>n</sup> quée-xí sǎ cuándute ñáyiu vitna, te naníhí tǎhú-yu te núu na quíndáá iní-yu tnúhu ndáá tnúhu Yă Ndiöxí. Te ñǎ díú sǎ cuándute-o te nduu ndoo nduu nine yíqui cǔñú-ó te naníhí tǎhú-ó, chi xini ñuhu-xi náhmá-ó núú Yă Ndiöxí nchaa yícá cuèchi-o, te nduu ndoo nduu nine iní-ó, te duca<sup>n</sup> te naníhí tǎhú-ó, chi Xítóhó Jesucristú ní xíhí-gá cuèndá-ó te ní ndoto-gá.

<sup>22</sup> Te Yaá-á<sup>n</sup> cuǎndaa-gá andiu, te ní ngóo-gá xio cùha Yă Ndiöxí, te tàxi tnuní-gá nchaa espíritú cúnùu ndíhi nchaa dava-gá cue espíritú xínú cuèchi.

## 4

### *Cada-o nàcuáa cuini méé Yă Ndiöxí*

<sup>1</sup> Te Xítóhó Jesucristú ní ndoho-gá cǔtnàhá ní xíndecu-gá ñuyíú-a, te vitna nchòhó cundecu túha-ndo ndòho-ndo cuendá-gá, chi nchaa ñáyiu ndòho nándi sá ndóhó cuèndá-gá dàñá-yu nchaa sá cuèhé sá dúhá.

<sup>2</sup> Te duca<sup>n</sup> ñà túú-gă ndécǔ-yu ichi cuèhé ichi duha, chi mee-nǎ nàcuáa cǎhá<sup>n</sup> Yă Ndiöxí quídě-yu ndècú-yu ñuyíú-a.

<sup>3</sup> Te nchòhó sa nàha-ndo sá ïo cuèhé nùú sã cuèhé sá dúhá nĩ xóo cada-o cùtnàhá vátá cùndècu-gá-ó ìchi Yá Ndiõxí, chi ní xóo cada-o nchàa sá cuèhé sá dúhá cùdíí iní nchaa ñáyiu ñá túú sàndáá iní tnúhu-gá, te dàvá-á<sup>n</sup> nĩ xóo cada-o nchàa núú sã cuèhé sá dúhá, te ní xóo caní cuèhé ní xóo caní duha iní-ó, te ní cuu-o cuè ñáyiu quihu, te ní xóo cundecu-o vico núú nĩ xóo cada-o nchàa sá ñà túú vãha, te ní xóo níhí tnáhá-ó ndihí nchaa tnaha quihu-o, te ní xóo chiñuhu-o nchàa sá cãchí-yu cùu ndiõxí te ñá ndàá sá ndiõxí cúú nchàa xiã<sup>n</sup>, te nándi-gá nchaa sá cuèhé sá dúhá nĩ xóo cada-o dàvá-á<sup>n</sup>.

<sup>4</sup> Te ñáyiu-á<sup>n</sup> cúññuhu-yu vitna sá ñà túú-gã nihí tnáhá-ó ndihí-yu cada-o nchàa sá cuèhé sá dúhá quidé-yu, te xiã<sup>n</sup> cãhá<sup>n</sup> cuèhé-yu cuendá-ó vitna.

<sup>5</sup> Dico sáá nduu te ñáyiu-á<sup>n</sup> ñãhmá-yu nchaa sá quidé-yu núú Xítohó Jesucristú, chi diu-gá sa ndècu túha-gá sá cádá ndãá-gá cuéchi nchaa ñáyiu sa ní xíhí, ndihí cuéchi nchaa ñáyiu xĩndecu vǐvú.

<sup>6</sup> Te cue ñáyiu sa ní xíhí ní xĩndedóho tnúhu Xítohó Jesucristú, te cuèi ní xíhí-yu dàtná xihí dava-gá ñáyiu, dico espíritú-yu chi ní nduu táhú-xi ndècu váha-xi dàtná ndécú Yã Ndiõxí.

<sup>7</sup> Te vitna ta cùyatni danaa Yá Ndiõxí ñuyíú-a núú xiã<sup>n</sup> ío váha cuáha-ndo cuendá nãcuáa cundecu-ndo, te cáhá<sup>n</sup> ndihí-ndo-gã.

<sup>8</sup> Te xini ñuhu-xi sá ïo cuu iní tnáhá-ndó ñi<sup>n</sup> ñi<sup>n</sup>-ndo, chi núu duca<sup>n</sup> na cùu iní tnáhá-ndó ñi<sup>n</sup> ñi<sup>n</sup>-ndo, te vá cáni-gá iní-ndó càda cuendá-ndó nchàa sá ñà túú vãha quide ñaha ñáyiu xii-ndo,

<sup>9</sup> te nchòhó ñáyiu xĩndecu vehe-xi cuáha nùu-ndo vehe xii cue ñáyiu ññuhu ichi na ndetatú-yu, te ío

váha cuu iní-ndó dùca<sup>n</sup> cada-ndo.

<sup>10</sup> Te Yá Ndiǒxí ní taxi-gá ndí díí<sup>n</sup> núú tǎhú ndécú ndìhi-ndo ì<sup>n</sup> ì<sup>n</sup>-ndo, te nàcuáa ndùu tǎhú nǐ nduu tǎhú-ndó ì<sup>n</sup> ì<sup>n</sup>-ndo te duca<sup>n</sup> chindee tnaha-ndo, te vá dáńá ndéé-ndó càda-ndo nchaa nacuáa tàuchiu<sup>n</sup> Yá Ndiǒxí cada-ndo, te chindee ñàha-gá xii-ndo.

<sup>11</sup> Te dava nchòhó ñáyiú càhá<sup>n</sup> tnúhu Yá Ndiǒxí núú ñáyiú, xìni ñuhu-xí cáhá<sup>n</sup>-ndó nàcuáa ndùu tnúhu-gá núú-yu, te dava nchòhó ñáyiú quìde nchaa núú chiú<sup>n</sup> chindee tnaha ñáyiú-xi, xìni ñuhu-xi cada-ndo sá Yá Ndiǒxí chíndèe ñaha-gá xii-ndo, te duca<sup>n</sup> càda-ndo nchaa núú sǎ vǎha, chi Xítóhó Jesucrístú tnàhá-gá chíndèe ñaha-gá xii-ndo, te duca<sup>n</sup> ìo cuu càhnu Yá Ndiǒxí. Te vitna tàú-ó càhá<sup>n</sup>-ó sǎ ìo càhnu cuu Xítóhó Jesucrístú, chi díu-gá cúnùu-gá nchaa nduu nchaa quíú, te duca<sup>n</sup> na cùnduu.

*Ndoho tnahá-ó cùndecu-o ichi Xítóhó Jesucrístú*

<sup>12</sup> Te nchòhó ñáyiú ío cùu iní-í, vá cúññuhu-ndo sǎ ìo ndòho-ndo ndecu-ndo ichi Xítóhó Jesucrístú, chi sá dúcá<sup>n</sup> ndòho-ndo-á<sup>n</sup> cùtnùní ndisa sá sàndáá iní-ndó-gǎ, te vá cání iní-ndó nǎ cuèndá duca<sup>n</sup> ndòho-ndo.

<sup>13</sup> Chi da cudíí ìní-ndó te núu ndòho-ndo datná ní ndoho Xítóhó Jesucrístú, te duca<sup>n</sup> sùúní cudíí ìní-ndó òré ná quìxi tucu-gá ñuyíú-a te dàvá-á<sup>n</sup> quiní-ndó sǎ ìo càhnu cuu-gá.

<sup>14</sup> Te núu xícuehé ñàhá ñáyiú ndècu ichi cuehé ichi duha xii-ndo cuèndá sá ndécú-ndó ìchi Xítóhó Jesucrístú, te xǎ<sup>n</sup> cúú-xí ì<sup>n</sup> sá vǎha sá cúú-xí-ndó núú-gǎ, te duca<sup>n</sup> chi Espíritú Yá Ndiǒxí sá ìo cùnuu ndecu ndìhi ñaha-xi xii-ndo, te nchaa ñáyiú ndècu ichi cuehé ichi duha-ǎ<sup>n</sup> càhá<sup>n</sup> cuèhé-yu cuèndá



Xítohó Jesucristú, dico nchòhó càchí-ndó sã ìo càhnu cuu-gá.

15-16 Te núu nchòhó dándòho ñaha ñáyiú xii-ndo sã cuendá sá ndécú-ndó ìchi Xítohó Jesucristú ñá, te vá cúú càhá<sup>n</sup> núú-ndó, chi ndacá<sup>n</sup> táhú-ndó núú Yã Ndiõxí cuendá sá ndécú-ndó ìchi-gá. Te cuèi ndòho-ndo ndecu-ndo, dico ñá túú cùu-ndo ñáyiú sàhni ndíyi te ni ñà túú cùu-ndo ñáyiú dùhu, te ni ñà túú cùu-ndo ñáyiú quìde cuehé quidé dùha, te ni ñà túú cùu-ndo ñáyiú chìndee tnúhu tnàha ñáyiú-xi ì<sup>n</sup> sá ñà túú tàú-ndó càda-ndo.

17 Te vitna sa quèsaha Yá Ndiõxí cada ndáá-gá nchaa sá quidé nchòo ñáyiú ndècu ndìhi-gá, te núu duca<sup>n</sup> te ndèé-gá cada-gá nchaa ñáyiú ñá túú sàndáá iní ñáhá xii-gá òré ná sàá nduu dùca<sup>n</sup> cada ñaha-gá xií-yu.

18 Te nchòhó xini-ndó sã ñáyiú quìde váha ndècu ìchi Xítohó Jesucristú ndòho tnahá-yu ndécú-yu, dico sáá nduu te nduu táhú-yu cundecú-yu ndìhi-gá. Te núu duca<sup>n</sup> ndòho nchaa ñáyiú quìde váha ña, ¿te nása-gá yáha nchaa ñáyiú ndècu ìchi cuehé ìchi duha na sáá nduu càda ndáá Yã Ndiõxí cuéchi-yu-i?

19 Te nchaa nchòhó ñáyiú ndòho nacuéa cuini Yã Ndiõxí xini ñuhu-xi sá vã dáñá ndèé-ndó càda váha-ndo cùndecu-ndo, te ío quindáá iní-ndó sã xító ñàha-gá xii-ndo. Te diu-gá cúú-gã Yaá ní cadúha ñaha xii-o, te quìde-gá ì<sup>n</sup> sá càhá<sup>n</sup>-gá.

## 5

*Nàcuáa tàú-xi cada ñáyiú ndècu ìchi Xítohó Jesucristú*

1 Te yúhú càhá<sup>n</sup>-í dóho nchaa nchòhó cue téé yìndaha nchaa dava-gá ñáyiú ndècu ichi Xítóhó Jesucrìstú, chi tnàhá yúhú yìndàha-í ñáyiú ndècu ichi-gá, te sàndáá iní-í tnúhu-gá, te ní xiní-í nchaa nàcuáa ní ndoho-gá, te sáá nduu te tnàhá-í cunuu-í ndìhi-gá.

2 Te ío canehe cuèndá-ndó nchàa ñáyiú ndècu ichi Yá Ndiöxí yìndàha-ndo te cada-ndo dàtná quidé cuè toli, chi cue téé-á<sup>n</sup> ïo váha xító-güedé mběé-güedě. Te canehe cuèndá-ndõ-yu sá cúú iní méé-ndó te ñá díú sã ío ì<sup>n</sup> ñáyiú cada yica ñàha xii-ndo, te ni ñà díú sã cuìní-ndó cùhu<sup>n</sup> yáhu-ndo, chi ni yùhu ni iní-ndó còto-ndó-yu, chi duca<sup>n</sup> cuìní Yã Ndiöxí cunduu.

3 Te vá cáda-ndó sã ïo cùnuu-ndo núü-yu, chi cada-ndo mèe-ni sá vãha cuèndá duca<sup>n</sup> cànchicú<sup>n</sup> nihnú-yu cáda-yu tnàhá-yu.

4 Te òré ná quíxí tùcu Xítóhó Jesucrìstú Yaá néhé cuèndá ñàhá xì-o nchaa-o ñuyíú-a, te taxi-gá sá ïo váha nduu táhú-ó, te cunuu-o ndìhi-gá ni caa ni quíhí<sup>n</sup>.

5 Te nchòhó ñáyiú ndècu ichi Xítóhó Jesucrìstú càhá<sup>n</sup>-í dóho-ndo sã ïo quìndáá iní-ndó cuè téé yìndaha ñàha xii-ndo nacuáa ndècu-ndo ichi-gá, te nchaa-ndo tàú-ndó quìndáá iní tnàhá-ndó ì<sup>n</sup> ì<sup>n</sup>-ndo, chi núú tùtú Yã Ndiöxí càchí-xi ì<sup>n</sup> xichi:

Nchaa ñáyiú quide cahnu mee-xi ñá túú cùu váha iní Yã Ndiöxí núü-yu,  
dico nchaa ñáyiú ndàhú iní-xi te chìndee ñàha-gá xí-yu.

Duha càchí-xi núú tùtú-gá.

<sup>6</sup> Te dañá-ndo mèle-ndo núú ndáhá Yă Ndiöxí, chi mee-gă ío cùnuu-gá. Te núú duca<sup>n</sup> na càda-ndo, te sáá nduu te cada nínu ñaha-gă xii-ndo.

<sup>7</sup> Te nchaa sá yăha-ndo ndècu-ndo te nachihi-ndo ndàha Yá Ndiöxí, chi mee-gă xító ñaha-gá xii-ndo.

<sup>8</sup> Te ío váha cuáha-ndo cuendá cundecu-ndo, te quíhi iní-ndó chi sácuíhná xícá cùu-xi cuiní-xi dacuíta nihnu ñaha-xi xii-o, chi ío cùu úhú iní ñáhá-xí, te cùu-xi datná ì<sup>n</sup> quítì déé<sup>n</sup> xícá ndùcu sá cáxí-xí.

<sup>9</sup> Te ío quindáá iní-ndó Xítóhó Jesucrìstú, te vá dáñá-ndó mèle-ndo dandahú ñáhá sàcuíhná xii-ndo càda-ndo nacuáa cuiní-xi, chi nàha-ndo sá ncháá ñăyiu ndècu ichi Xítóhó Jesucrìstú xĩndecu nihíi ñuyíú ndóhō-yu dàtná ndóhó nchòo ndecu-o ichi-gá.

<sup>10</sup> Dico sacú-ni nduu duha cundoho-o te dătnùní ñá túú-gă ná cumání-ó cùndecu-o núú Yă Ndiöxí, te dàvá-á<sup>n</sup> vă cání ì<sup>n</sup> caní úú iní-ó cùndecu-o ichi-gá. Te ío-gá ngúndecu ndihi-o tnúhu ndee iní cada-o nchàa nacuáa càhá<sup>n</sup>-gá, te duca<sup>n</sup> càda-o chi mee Yă Ndiöxí ío chindee ñaha-gá xii-o, te ðiu-ni Yaá-ă<sup>n</sup> ío cùu iní ñáhá-gă xii-o, chi ní cáhá<sup>n</sup> ñáhá-gă xii-o cùndecu-o núú ío váha càa ndecu-gá cundecu-o ñi caa ñi quíhí<sup>n</sup>, te duca<sup>n</sup> ñi quide-gá chi ní sándáá iní-ó Xítóhó Jesucrìstú.

<sup>11</sup> Te ío ndacá<sup>n</sup> táhú-ó núú Yă Ndiöxí chi ío càhnu cuu-gá, te cùnuu-gá nchaa nduu nchaa quíú. Te duca<sup>n</sup> na cùnduu.

*Tnúhu ndéé núú ñi ndihi-ná*

<sup>12</sup> Te té Silvanú xìní-í sá cúú-dě ì<sup>n</sup> tée quide ndáá ndécú ichi Xítóhó Jesucrìstú, te ðiu-dě ní cáhá<sup>n</sup> ndàhú-í núú-dě ní tee-dé ì<sup>n</sup> úú tnúhu sá ñi xáha<sup>n</sup>-í

xii-dé núú tütú-a cuèndá daquìxi-í ndaha-ndo, te núú tütú-a càchí tnúhu ndáá-í xii-ndo sã Yã Ndiõxí ío cùu iní ñáhá-gã, te chìndee ñaha-gá xii-ndo ndècu-ndo, te càchí tnúhu tucu-í xii-ndo sã ïo quindáá iní-ndó sã ndàá duca<sup>n</sup> quìde ñaha-gá xii-ndo.

<sup>13</sup> Te cue ñáyiú ndècu ñuú Babiloniá, ñáyiú ndècu ichi Yá Ndiõxí, diu-ni ñáyiú ní cachí Yã Ndiõxí sá nánihí tàhú dàtná cúú nchòhó, ío quìde ndee iní ñáhã-yu xii-ndo, te tnáhá té Măcú tée cùu datná ì<sup>n</sup> déhe-í quídé ndèe iní ñáhá-dě xii-ndo.

<sup>14</sup> Te ndihí tnúhu yiñùhu cada ndee iní tnáhá-ndó ì<sup>n</sup> ì<sup>n</sup>-ndo, te xicá<sup>n</sup> táhù-í núú Yã Ndiõxí sá ïo na cùndecu nahi nchaa nchohó ñáyiú ndècu ndihí Xítóhó Jesucrístú. Te duca<sup>n</sup> na cùnduu. Te ío chí cádá ndèe iní-nã vitna.

**Tnúhu ní cáhá<sup>n</sup> yǎ ndiǒxí xito cùu uú**  
**New Testament in Mixtec, Peñoles (MX:mil:Mixtec,**  
**Peñoles)**

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

**Copyright Information**

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Peñoles

**© 2002, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

872f7754-0986-5ecd-a059-925a708a6939